

## COLUMNA

# Detectivs digitals

BENEDETTO VIGNE

**E** puspè ina reminiscenza: Enturn Bumaun 1989 haja passentà in pèr emnas en Argentina. Adina in pau interessà als fatgs culturals en il pajais da mes segiurn, legev'jau regularmain las gasettas, spagnol chapiv'jau gea detg bain. Qua stgarpitsch jau in di sur la recensium d'in'antologia analitica da la musica rock argentina, ina cultura che datescha già a partir dals onns '60!

**I** na ritga tradiziun pia, quella scena indigena, e damai che jau m'occupava fitg cun quel gener musical, ha la chaussa sveglià mias mirveglias. Betg mo hai jau cumprà il cudesch, jau hai er gist empruvà da contactar in dals dus auturs, in tschert Eduardo de la Puente. Co che jau hai fatg quai? Jau hai simplamain consultà il cudesch da telefon da Buenos Aires, e vualà, immediat haja chattà adressa e telefon dal tschertgà.

**E** lura essan nus ans entupads en ina confiteria (sco ch'els numnan là ils cafés), avain baterlà e discutà, ed el m'ha fatg ina glista dals 20 pli interessants albums da rock e pop argentin. Onns pli tard m'ha Eduardo procurà il bigliet gratuit d'entrada per il fa-



mus concert da cumià dals Soda Stereo en il stadion River Plate a Buenos Aires – ma gliez è in'autr'istorgia.

**P** ertge che jau raquint questa anecdota? Fitg simpel: Emprova da chattar ozendi contacts u coordinatas d'insatgi, oz ch'adina daplì persunas han be pli in telefonin portabel ed han bandischà il vegl telefon fix, svanind uschia or dal cudesch da telefon uffizial. La lescha da datas, en vigur dapi l'onn 1993, scumonda ad uffizis statals, chantunals u communal, ma er a firmas ed instituziuns da palesar adressas u insumma infurmaziuns davart persunas privatas a tgi nunautorisà che quai saja.

**T** ge far dunque? Googlar ad in googlar en l'internet sch'ins chattass là in indizi u in fastiz. Scrollar cun la funcziun «search» en

vegl e-mails sin tes computer. Dumandar collegas ch'han forsà lavorà ina giada cun la persuna tschertgà, sche quels avessan magari in'idea. Eruir ina parenta e scriver a quella – perdunai il disturbi! – per avair notizias da quel tal u da quella tala. Sa regurdar d'in ami d'in'amia d'in cusrin dal barba dal tschertgà. Ins daventa vairamain in detectiv en quests dis post-moderns digitals.

**U** bain: co che quai era tut pli simpel al temp dal vegl telefon.

**P** S 1: Facebook!! – Gea, ma ins sto er esser da la partida en quest benedì social medium.

**P** S 2: Karin Keller-Suter u Daniel Vasella n'avess jau probabel er betg chattà da quel temp en il cudesch da telefon – ma guarda qua: Christoph Blocher figurescha anc adina en la glista!

**P** S 3: Eduardo de la Puente tschertgass jau ozendi er adumbatten – en il fratem è el daventà in star cabarettist da la televisiun argentina.

**Benedetto Vigne da Turitg è autor e schurnalist liber.**